

A Apfentgschicht us o Drißgarjohro

Das olt Hus und d'r Apfent

Das olt Hus hat a bsundrs Leabo g'hea, a bsundore Weme, a bsundore Luft, a bsundrs Lacho und a ehrlichs Truro. D'Holzsteaga händ gurot, si händ mitgredot und gseyt, wenn nossar ku ischt und wenn nossar gango ischt. Uf om Gangbönkle vor or Küche hat mäng ama Ma zu dänar Zit a Tellar vol Suppo uf o Knüo g'hea und ischt mit am "Gott vorgealt's" wieder gango. I d'r Schtubo ischt a feshta Dinnbodo gsin, deam hat ma na om Wäscho mit truckonam Seagmehl d'Nässe gnu. Das Hus ischt vol Leabo gsin wia dor Bah, wo a eahm vorbigloufo ischt.

Im Apfent ischt 's Is übor dea Bah gango, und 's Wassr ischt gonz absundorle schtill und dunkl undorm Is vrschloffo und hat dia schöano Schneekrischtall mitgnu, dia eahm d'Aruoböscho im Luft geschenkt händ.

Dia Lüt i deam Hus händ nünts Übrigs g'hea wia do no viel ondor ou. Hüt seyt ma, as si a ame Zit gsin. Abor 's Wihwassorkessele neabod dor Schtubotöör ischt nia trucko wordo und 's Nüschtor nia schtoubig. Ma hat do Apfent inbeatot und ingsungo fascht jedo Obod. D'Schuolufgaba heandorn Isbluomo im Voarfioschor sand a Bitt gsin um oa große Klosonuß a dia hoalig Zit. Dia Apfentliothle i deam Hus sand klin und schparsam gsin und gli viel heallor as all dia vielhundort Liothor, dia ou bi üs hüt um d'Husgiebl schlüfod. As ischt a ame Zit gsin - abr was ischt a ame Zit? Dia Zit hat ou an Apfent g'hea, an Apfent mit ar viel tüforo Seel im Gloubo a das Guot übor dia Geburt Christi z'Bethlehem - as hüt, moan I. Das olt Hus ischt gego Wihnato zuo allat schtillor wordo, und uf oamol ischt d'r Christbomm im Schtuboegg gschtong. Dar hoalig Obod hat scho früoh

d'Schtubotöör pfloßo, und das sus sa lut Leabo i deam
Hus ischt schtill abe dor o Schtadl in Stal zu däna zwo
Küehlen, zum Kälble, wo Klos broot hat, zuor Su und
zu'n Henno oboror Sustieg. D'r Schofbock ischt sofort
heandorsche zruck, bis ar nümma witor hat künno a d'r
Stalwond und hat gscharrot,abr niamed hat eahm hüt
greobo mit ar Fungscht a dor Schteono und eah trätzt as
wia sus 's gonz Johr. Ou im Stal ischt dr Wihrouh
umgango. Und denn hat ma's fascht nümma arwartot, bis
ma's g'hört hat: "s Christkindle ischt ku!" D'Schtubotöör
ischt schperangelwit offo gsin, und ma ischt artschtong
vor deam liichtvollo Bömmle. Wia vo sealb sand dia dick-
vorschaffoto Finger vom Vatr i dia Sota vom olto Gitärle
gango, und das "Schtille Naht, heilige Naht" hat d'Lüt und
dia olt Schtubo zitvorwandlot i das Wundor vo Bethle-
hem. Und escht denn hat ma zoje döaro zu däna sealb-
gschtrickto Schwettarn und Schtrümpfo, zun husgmachoto
Poatscho und zu däna viela klinno Wünscho sus, dia
ou no woahr wordo sand. Nia meh hean I sovl Glück in
Ougo vo d'r Muottr gseha as wia do - und denn seyt ma
hüt - as si a ame Zit gsin. . .